

13467/p

*Tentamen Medicum de
Variolis. — 1767. —*

F

VIII

3/b

29128

F. xviii.

18/6

13467/P
**TENTAMEN
MEDICUM**

**DE VARIOLIS,
CUI ACCESSIT APPENDIX
DE VARIOLARUM INOCULATIONE,
SEU INSITIONE,**

QUOD, in Augustissimo Ludovico
Medico Monspeliensi, Deo duce &
auspice Dei-parâ, propugnare conabitur

AUTOR

FRANCISCUS BERTHELOT DE BEAUREGARD,
Bercorienfis, apud Pictones, Diœcesis
Rupellenfis, Artium Liberalium Magister,
nec-non in Almâ Universitate Monspe-
liensi jamdudùm Medicinæ alumnus,
die mensis Februarii anni 1767.

PRO BACCALAUREATUS GRADU CONSEQUENDO.



MONSPELII,
Apud AUGUSTINUM-FRANCISCUM ROCHARD, Regis & Uni-
versitatis Medicinæ Typographum unicum.

M. DCC. LXVII.

77304



Digitized by the Internet Archive
in 2018 with funding from
Wellcome Library

<https://archive.org/details/b30368601>



Baumés. fecit

Monspeli



ILLUSTRISSIMO NOBILISSIMOQUE VIRO

D. D.

CAROLO - LUDOVICO - ANTONIO - GENOVEFÆ

MARCHIONI DE MONTAIGU,

COMITI DE LA CHAIZE,

D. DE CIRIERES, MONTIGNI, BRETIGNOLLE,

CHAVAGNE, LA CHAUSSE'E, LA BOBINIERE,

LE BEIGNON, &c. &c. &c.

GRAVIS ARMATURÆ MILITUM VEXILLARIO.

MECENAS ILLUSTRISSIME,

*Egregio nomine tuo decorari frontem opusculi
mei quod benignus annueris, mira gratum pectus
pertinent gaudia, nec tacitum; quid enim silerem
in tam vastâ rerum dicendarum segete? Quò præ-
stantior videberis Avorum antiquissimis stemmatibus,
exemplis, intemeratâ fide insignique pietate ergà*

Regem , Patriam , certo ergà clientes patrocínio ,
ergà omnes benignissimâ Comitâte ; eò major in me
redundabit honoris dulcissimi titulus , cui favere
imprimis dignatus es : dicam ergò Sed dic-
turum protinùs moratur modestia virtutum tuarum
integerrima comes , cui malè si palpare , recalcitrat
undiquè tuta ; urgentiùs cohibet haud vanus
timor , ne mei culpâ ingenii deterantur laudes Tul-
lianâ facundiâ celebrari dignæ. Silebo itaquè in-
vitus satîs superquè nota omnibus queis datum est
vel tantispèr ore tuo frui. Ast gratissimos sui ergà
te affectus , intimâ veneratione omnigenoque obsequio
signandos ubivîs , nuspiàm silebit ,

MECENAS ILLUSTRISIME ,

**Tibi Cliens addictissimus
obsequentissimusque**

FRANCISCUS BERTHELOT.

*Dabam Monspelii die
Februarii anni 1767.*

mensis



TENTAMEN MEDICUM DE VARIOLIS.

ARTICULUS PRIMUS.



ORBUM hunc esse novum, hoc est, antiquis Medicis tam Græcis, quàm Romanis ignotum, extrà dubium esse videtur, quidquid contrà asserant quidam autores, inter quos summum *Riverium* nominasse satis fit. Credibile etenim non est primos illos artis Medicæ Magistros, in signis morborum omnium describendis & distinguendis diligentissimos, morbum tam atrocem & contagiosum, si agnovissent, non fuisse depicturos.

Ex Arabum igitur autorum libris petenda est prima hujus-ce morbi notitia;

inter hos *Rhases* in libro ingenti, cui titulus *Continens*, *Acaronem* quemdam tradit triginta libros de Medicinâ scripſiſſe, in quibus ſigna Variolarum, genera diverſa & curandi modum explicuit. Is Alexandria natus, *Mahumede* Imperante, anno DCXXII. Medicinam exercuit. Hinc conjicit *Illustr. Freindius* in Ægypto fortasſe prima exordia habuiſſe Variolarum morbum. At paulò antiquiorem reperit ejus originem in Arabicis Doctiſſimus *Joannes-Jacobus Reisk*, qui in veteri codice Arabico manu ſcripto Bibliothecæ Leydenſis, hæc verba ſe legiſſe dicit: *hoc demùm anno comparuerunt primùm in terris Arabum Variolæ & morbilli*. Annus ille erat poſt Chriſtum natum DLXXII.

Circà autèm ſæculum ſeptimum, ex Aſiâ in Europam, cùm bella *Croſades* dicta vigeant, advectus fuit ille morbus; ex Europâ verò in Americam deductus, quo tempore *Fernand* aut *Ferdinand Cortez* Mexicanam Carolo V. Imperatori ſubjecit, anno MDXXI.

Variolæ, gallicè *petite Vérole*; Occitanis plurimiſque aliarum Galliæ Provinciæ incolis *Picotte*; *Bocten* Germanis; *Smallpox* Anglis; *Vaiola* Italorum; ſunt genus phlegmaſiæ exanthematicæ ſæpiùs

epidemicæ, cujus eruptio in pustulis phlegmonodæis ad suppurationem tendentibus, pisi magnitudinem demùm æquantibus, consistit.

Tertio aut quarto ut plurimùm die ab invasione febris inflammatoriæ, erumpunt phymata inflammatoria, per faciem primò, dein per collum, pectus, manus, tùm per totum corporis habitum disperguntur; ad octavum usque diem rubent, inflammantur; tunc incipiunt albescere, exasperari, in suppuratum tendunt. Undecimo circitèr die rumpuntur abscessuli, & humor quidam luteus, puriformis, à flavo non abludens, quandòque, sed rariùs pellucidus, evomitur. Pus istud Variolosum adeò viscidum est, ut crustas efformet, sub quibus delitescit pus acre, subjectas partes fodicans, foveasque diffformes relinquens. Sunt hæc varia stadia, quæ successivè phymata Variolosa percurrunt.

ARTICULUS SECUNDUS.

DIFFERUNT Variolæ à rubeolâ, quod papulæ rubeolosæ in cuticulæ furfuraceam desquamationem vergant, præcedatque coryza, epiphora, tussis; quod præludium vix unquàm Variolas præcedit; differunt à

peste , quod in peste erumpant bubones vel anthraces , in Variolis pustulæ sensim crescentes , suppurantes, dein crustaceæ , quibus elapsis remanent in cute foveolæ; à *pemphygo* , gallicè *fièvre vésiculaire* dicto, quod pemphygus bullas vel vesiculas aquâ plenas nukulæ magnitudine proferat; &c.

Variolæ aliæ sunt discretæ , quarum pustulæ ab invicem remotæ & distinctæ sunt; harum aliæ sunt benignæ , absque adjuncto periculo sua stadia decurrentes , & ita mites quandòque , ut tacti puelluli vix febrire videantur , & per plateas absque noxâ divagentur ; aliæ malignæ , quæ dùm sua tempora absolvunt , urgens imminet vitæ periculum. Aliæ sunt confluentes, quarum pustulæ benè multæ invicem cohærent , unicamque crustam efformare videntur. eandem patiuntur in benignas & malignas divisionem confluentes , ac discretæ Variolæ : cum eo licet discrimine , quod confluentes sint periculosiores discretis. Quandòque tamèn in peculiaribus quibusdam epidemicis constitutionibus observare est confluentes Variolas periculo destitutas , dùm discretas periculum subsequitur. Notare hîc expedit confluxionem æstimari ex modo , quo phymata Variolosa in facie

fese produnt ; si enim in facie confluerint, ut in reliquo toto corpore discretæ, confluentes dicuntur, & vice versâ.

Aliquandò pustulæ durissimæ sunt, in suppuratum difficilè abeuntes, sed progrediente morbo deciduæ, verrucarum formam induentes, & ideò *verrucosæ* dictæ. Aliquandò liquore lymphido turgidæ pellucescunt, bullam crystallinam æmulantes, undè illis *crystallinarum Variolarum* nomen ; solent esse pessimæ indolis. Quandòque benemultæ pustulæ ità invicem cohærent, ut in unam duæ tres-ve coalescant, aut saltè in facie in corymbos sint aggregatæ, tunc *corymbosæ* dicuntur. Hæc species est 4a. confluentium malignarum *Helvetii* ; gallicè dicitur hæc species *petite Vérole à placards*.

Plurimæ sunt aliæ Variolarum species, quas hîc tantùm per transennam enumerare sufficiat ; nil enim ultrà finunt arctiores hujus tentaminis cancelli. Qui plura hâc de re desiderabunt, adeant nosologiam methodicam, autore hujus-ce licæi Professore Medico Illustrissimo D. D. *Boissier de Sauvages*.

INTER DISCRETAS :

- 1a. Species : Variola lymphatica, *petite Vérole volante*, vulgò *Verette* & *Verolette* gallis.

- 2^a. Variola benigna, 1^a. Helvetii species, regularis Sydenhami, *petite Vérole discrète simple*.
- 3^a. Variola complicata, Helv. 2^a. species, *la discrète compliquée*, anomala Sydenh. *petite Vérole discrète maligne*.
- 4^a. Variola dysenteriodes Sydenh. *Const. ann. 1670*.
- 5^a. Variola vesicularis Mead. *Crystalline discrète*.
- 6^a. Variola filiquosa Mead.
- 7^a. Variola miliaris, 3^a. spec. Helv. *petite Vérole très-discrète, vésiculaire & pourprée*.

Ad Variolas discretas benignas plerumque spectat insititia Variola; sed de istâ specialius erit quæstio in sequentibus.

INTER CONFLUENTES:

- 1^a. Variola confluens, *petite Vérole confluente simple* d'Helvetius 1^a. spec. confluens regulares Sydenh. Freind.
- 2^a. Variola cohærens, 2^a. spec. confluentium malignarum Helv. *petite Vérole cohérente*.
- 3^a. Variola nigra Sydenh. 3^a. spec. confl. malign. Helv. aliis Variola scorbutica, *petite Vérole noire ou scorbutique* Sydenh. ann. 1674.

Si Variolæ stadia sua uniformitèr de-

current, *regulares* dicuntur; quæ autem decursum suum absolvunt cum intercurrentibus symptomatibus à febre putridâ putà, vel malignâ ortis, *anomalæ* appellantur.

Petuntur & quoque Variolarum differentiæ ex modo quo propagantur; hinc si paucos afficiant in urbe, *sporadicæ*, si plures invadant, *pandemiæ*, si è regione in regionem grassentur, *epidemicæ* dici solent à Medicis.

ARTICULUS TERTIUS.

VARIOLÆ regulares cum horrore, rigore invadunt, quos mōx excipiunt cephalalgia & lumbago graviores, calor maximè intensus, vomitio, ingens in adultis ad sudores, & in pueris infantibus-ve ad diarrhæam propensio, doloris sensus in partibus quæ scrobiculo cordis subjacent, si manu prematur, stupor etiàm & somnolentia in infantibus præprimis, quandòque ecclampsia, seu convulsio.

Quoad eruptionem; quarto ut plurimum in discretis, & tertio in confluentibus die ab invasione morbi, erumpunt phymata Variolosa, hæc in confluentibus superficialia, contigua, tumente adeò facie, ut

non malè vesicam inflatam rubram referat; in discretis verò pustulæ apparent subrubræ, quò ferius, eò melius, intrà datos limites. Puncticula seu maculæ rubræ, acuminatæ, in quo à purpurâ differunt, initio rariores faciem, mentum, pectus occupant; sensim crescunt pustulæ, extuberant usque ad septimum diem, quo desinit eruptio & incipit suppuratio. Per hoc tempus dolor fauces devastat, qui unà cum pustulis surgentibus augetur, quæ in dies grandescunt, & in majus fastigium elevatæ, cutem carnesque vicinas rubore afficiunt & inflammatione.

Octavo circiter ab invasione morbi die, quarto à pustularum eruptione, symptomata quæ deferbuerant, denuò reviviscunt, pustulasque ad laudabilem suppurationem deducunt. In genere discretæ pustulæ hætenus leves, rubræ, exasperantur & albicant, basin earum cingit circulus roseus optimæ notæ. Factâ suppuratione, undecimo circumcircuit die aperiuntur pustulæ, & liquorem suum fundunt, mitescunt symptomata, non amplius apparitura. Tunc ut plurimum præterlapsum est omne periculum. Interim tamen in constitutionibus quibusdam epidemicis observatum fuit, exsiccationis tempore

pore febrem putridam suboriri secundariam, omnes fermè ægrotantes vario modo ad orcum ducentem; alii siquidè febris intensitate peribant: alii febre lentâ correpti conficiebantur: alii tandè abcessibus symptomaticis varia viscera devastantibus absumebantur.

Illustriss. *de la Mettrie*, in suo de Variolis tractatu, existimat, post *D. Hecquet* quem secutus est, febrem secundariam Sydenhami non esse novam febrem Variolis ad finem perventis supervenientem, sed tantùm recrudescentiam ejusdem febris, quæ phymatum eruptionem præcesserat.

Discreta benigna habet pyrexiam verè continuam, quæ in quibusdam subjectis vix est conspicua, & infantes more solito esuriunt, impunè offas suas manducant, ludunt in lectulo suo, rident, maximè eruptione peractâ. Observatur tamèn, sed rarò, pyrexia remittens, ut amphimerina, quam vidit Celeberrimus hujus-ce lycæi Professor *D. D. Boissier de Sauvages*, & triteophia, quam *Helvetius* observavit.

Datur varietas, in quâ 7^o. die nulla suppuratio fit, sed pustulæ sensim terminantur, absque ullo vitæ discrimine, & quandoque sine pyrexia sensibili. Hanc varietatem *resolutam* Angli *chichénpoches* appel-

lant ; quod sedulò distinguendum est à retrocessu pustularum , qui in aliis speciebus aliisque stadiis accidit , & funestissimus est. *De his consulatur Helvetius.*

In confluentibus Variolis eruptio fit tertio die aut citiùs , & quò citiùs , eò magis confluunt pejoresque sunt Variolæ. Interdùm tamèn , ratione doloris atrocis , ut nephralgiæ , lumbaginis , pleurodines cum vomitu , retardatur ad quintum diem. Symptomata non remittuntur ab eruptione , ut in discretis , sed ultrà perseverant. Febris singulis diebus vesperè exacerbat , pustulæ confunduntur in vesiculam rubram , quæ totum vultum contegit , nec multùm ultrà superficiem cutis protuberant.

Sunt hæc Symptomata , quibus sese produnt Variolæ discretæ & confluentes , quibus adduntur symptomata duo , quæ Variolis confluentibus accidunt , haud minoris momenti ex *Sydenhamo* , quàm pustulæ ipsæ , vel tumor , vel aliud quodcumque ex prædictis : *salivationem* dico in adultis , & *dyarrhæam* in infantibus. Horum prius ità se perpetuum comitem Variolis confluentibus adjungit , ut vix unum prædictis Variolis laborantem videris , nullâ superveniente salivatione. Dicta salivatio nonnunquàm sub primum eruptionis tem-

pus se prodit, aliquandò verò non nisi uno duobus-ve diebus præterlapsis. Die autèm ferè undecimo cessat salivatio, & nisi tunc crescat faciei manuumque intumescencia, de ægro conclamatum est. Dyarrhæa non ità maturè infantes hâc Variolarum specie laborantes solet invadere, ac adultos ptyalissimus. Quo verò tempore ingruit, nisi ante sistatur, singula morbi stadia decurrit.

ARTICULUS QUARTUS.

QUOAD principia procathartica, nulla alia cognoscuntur, præter vim contagii in constitutionibus epidemicis; nullus in sex rebus sic dictis *non naturalibus* error, suscipiendis Variolis favere adhucdùm visus est.

Infantes, pueri frequentius hoc morbo corripuntur, sed ità ut qui hoc morbo semel tactus fuerit, ab illo deinceps ut plurimum vivat immunis. Sunt tamèn observationes, rariores licèt, quibus evincitur eundem hominem bis Variolis laborasse. adultos quandòque, rarò senes, rarissimè decrepitos invadit hæc ægritudo, ubi verò eos adoritur, res periculo plena est.

Attendendo ad symptomata Variolis pe-

culiaria , & ad novam hujus morbi in Europam invafionem , quæ caufis generalibus minimè poffunt adfcribi , neceffariò cogemur recurrere ad caufam peculiarem Variolas excitantem , quæ caufa peculiaris *virû* aut *miasmatis* nomine indigitatur apud autores. Quæ fit ejus effentia à priori demonftrari nequit : verùntamèn prædicta fymptomata trutinatim penfitata videntur indicare feminium Variolofum ejus effe naturæ , quæ inflammationem concitet. Porro inflammatio , feminii Variolofi soboles , varia erit pro variis principiis , fubjectis , temperamentis , &c. Nunc eryfipelatum ritu confluent in temperamento fervido , biliofo , apud juvenes qui cibis aromaticis , liquoribus ardentibus prætermodùm indulgere , fanguinis acrimoniam fatès denotat ; nunc verò phlegmonum benignitatem æmulans , difcreta in fanguineis , queis arridet vita defes & otiofa , dùm interim cibis euehymis affatim ingurgitantur , fpiffitudinem fanguinis designat.

Admiffò autèm tali viru Varioloso , non facilè conceptu eft quare qui femel Variolas paffus eft , per reliquum vitæ tempus ab iis immunis vivat ; quod tamèn fecùs accidit quotidie apud alio viru infectos ; fic qui jam lue venereâ tentatus

fuit , rursus hæc potest affligi : quod ita esse infelix & frequentior testatur experientia. An adest præsens seminium , quod ubi dissipatum est , nuspiam in sanguinem denuò transmitti potest ? An illud seminium à parentibus in prolem jure quodam hæreditario transmittitur ? An à sanguine materno foetus sanguinem inficiente , originem suam sumit hæc tetra lues , ut contendit *Riverius* ? An caliditas & humiditas , quæ majores sunt in infantibus , quàm in pueris , in pueris majores , quàm in adultis & sic deinceps , in causam Variolarum esse possent , ut vult *Rhases* ? Res scitu ardua , & tyronis haud par humeris onus.

De Variolarum contagio nihil est quod dicam specialitèr , ut potè omnibus cognito , vel rudioribus ; id tantum per transfennam notare liceat , cum D. *de Lamure* hujus-ce lycæi Professore Regio Clarissimo , & in rebus Medicis versatissimo , (in solutione quæstionis secundæ , pro Regiâ Cathedrâ vacante , per obitum D. *Gerardi Fitz-gerald* , ipsi propositæ ,) nempè causam Variolas excitantem , qualemcumque demùm sit , imò & vim ipsam contagii non sufficere ad morbum talem per se producendum in eo , qui semel vim hujus expertus est. Datur egregium exem-

plum à Celeb. Jurino communicatum Societati Londinenfi, *transact. Philosoph. tom. 2.* mulier cuidam Varioloso affidebat; ille delirus factus lecto exiliebat, eamque cervice præhensam brachiis nudis complexus, pressit hujus frontem adversus pectus denudatum, & pustulis Variolosis maturis coopertum, & in eo situ aliquandiu detinuit: exindè huic mulieri pustulæ subortæ sunt in fronte & partibus posticis & lateralibus cervicis quas attrectarat æger, quæ omnes mutationes quas subeunt Variolæ, subierunt absque alio incommodo, & pustulis nullis conspicuis in aliis corporis partibus contactum Variolosi non expertis: hæc mulier Variolis laboraverat antea, & quidè confertis. *Vid. loc. cit.*

ARTICULUS QUINTUS.

VERSATUR Variolarum diagnosi, tùm circa dignotionem Variolarum antè eruptionem & tempore eruptionis, tùm etiàm circa diversas earum species.

1^o. Quod attinet ad primum caput; vix certis dignoscuntur signis Variolæ, antequàm phymata Variolosa in conspectum se dederint; instantium tamèn Variolarum habetur certitudo quæ requiritur in praxi.

Medicâ , quæque sola haberi potest , si æger doloribus circâ scrobiculum cordis , versùs lumbos , aut caput angatur , si vigeat febris acuta , præ calore inflammatoriam sapiens : si in infantibus maxima & insolita adfit ad somnum proclivitas , in adultis verò ad sudores propensio : si adsint terrores in somno , sternutatio & pandiculatio frequentes , spirandi difficultas , calor , rubor , & punctiōis sensus in toto corpore , magna anxietas & inquietudo , lacrymæ involuntariæ , tumor quidam faciei cum aliquo rubore : si cum hisce signis , vigeat epidemica constitutio Variolosa , & æger nuspiàm Variolas &c. Tunc ægrum Variolis laboraturum conjicitur. Utut certissima videantur hæc signa memorata simul concurrentia , aliquandò tamèn observantur , quin subsequatur Variolarum eruptio , & erumpunt aliquandò Variolæ , absque eo quod præcesserint hæc signa. Longè faciliùs & certiùs dignoscuntur Variolæ , ubi ob oculos erumpentes pustulas habemus , tum ex ipsâ phymatum intuitione , tum ex factâ ad alia symptomata attentione.

2^o. Utrùm ex confluentium discretarumve numero futuræ sint Variolæ , ad sequentia sedulò attendenti fortè patebit :

1°. Ad constitutionem epidemicam, quæ alterutri generi magis favere videatur. 2°. Ad intensitatem symptomatum. 3°. Ubi incipiunt apparere pustulæ, si tertio ab invasione febris inflammatoriæ die prodierint, has è confluentium grege censendas esse, si quarto die appareant, inter discretas annumerandas esse, multiplex docuit observatio *Sydenhamum*. Certior longè evadet diagnosi, si jam faciem phymata Variolosa obfideant. Si enim phlegmonulos æmulantia, sub tumorum elatorum probè circumscriptorum, à se invicem remotorum formâ appareant, discretæ sunt; si erysipelatûm ad instar non multum promineant, nullo limite sensibili circumscriptæ, aliæ in alias confluant, ità ut tumorem erysipelatodæum vultus referat, confluentes judicantur; atque ità ex facie, uti suprâ innuimus, æstimatur confluxio.

Inter signa quæ certius tum Variolas imminentes arguunt, tum bonam earum indolem prænuntiant, nullum constantius observavit *Sydenhamus*, quàm motus convulsivos in infantibus subortos, eâ quidè lege, ut si vespertinis horis motibus convulsivis conflictentur, sequenti aurorâ erumpant Variolæ, & quidè è discretarum genere.

An benignæ , an malignæ , an regulares ; an anomalæ futuræ sint Variolæ , ex peculiari constitutionis genio conjicere fortitàn possumus.

ARTICULUS SEXTUS.

NEMINEM fugit Variolas ominosiores esse sub ætate provectâ , quàm in infantili vel juvenili , quia teneræ ætati morbus hic est familiaris , & huic quasi proprius. Variat tamèn prognosis , pro variâ constitutione epidemicâ & symptomatum intensitate. In genere , & constantiori lege , genus discretum parùm secum importat periculi , dùm econtrâ confluentes nuspiàm periculo destituuntur : nisi fortè excipias constitutiones epidemicas quasdam , easque oppido raras , quibus constans lex invertitur , & periculum stipat discretas , dùm stadia sua confluentes absque periculo decurrunt.

Si primò altero-ve morbi die erumpant pustulæ Variolosæ , res est ancipitis aleæ , nec minùs periculosa censetur tardior eruptio. Felicem eventum hariolari licet , si pustulæ phlogodæx ritè promineant. Multum terrorem incutiunt Variolæ Medico , si retrocedant pustulæ , nullâ remanente cutis intumescentiâ. Febris post eruptionem

persistens, morbum gravem minatur: nec vano metu Medicos terrent exanthemata atro-livida, vel gangrænodæa, linguæ labiorumque nigredo. Pro exitiali habetur mictus cruentus. Innoxia censentur catamenia inter morbi curriculum erumpentia. Inter calamitosa recensentur symptomata ischuria, dysuria & alvi fluxus nimius, præsertim dysentericus, ob pustularum subsidentiam, quam post se trahit iste fluxus, in ætate provectis præprimis. Ptyalismus sufflaminatus in adultis, vel dyarrhæa suppressa in infantibus funesti persæpè sunt ominis.

Nec ferè ad finem pervento morbo, ideò in vado pronuntiandus est æger: alia pertimescenda adhuc supersunt infortunia; accidit enim quandòque ut exsiccationis tempore febris secundaria superveniat, quæ ægrum vel promptæ morti tradit, vel lentà tabe conficit. Pertimescendi sunt & quoquè abcessus, non solum partes externas invadentes, sed sæpiùs intrà viscera delitescentes, gangræna & caries, aliique affectus exitiales; ut de cæcitate, surditate, crurum resolutione, &c. nil addam.

Notare expedit hîc loci, quod quandòque Variolis comites se adjungant morbilli: quod variationi prognoseos locum

dare potest; ominosiores enim censentur hujusmodi Variolæ complicatæ. Clariss. *Ethmullerus* curiosam refert historiam feminæ, quam curavit, quæ uno corporis in latere Variolas, morbillos in altero gereret. *Sidobre* Monspeliensis Doctor asserit se observasse, cum *D. de la Peyronie* in puero cujusdam piscatoris Monspeliensis, Variolas unâ cum morbillis vigere. Idem refert *Diemerbroek*. Cæterùm Variolis mox successisse morbillos, morbillis Variolas, exempla habent *acta Med. vol. VI. pag. 370*. *Illust. de Haën* sic loquitur: „puella habet
 „confluentes Variolas: hæc ubi febris post-
 „suppuratoria deferbuerat, illicò morbillis
 „maximè epidemicis corripiebatur & mor-
 „riebatur.” Idem se vidisse testatur *Harris* apud Serenissimam Anglorum Reginam. *De morbis acutis infantum lib. 2^o. observ. VIIa. de Variolis anomalis, sive cum morbillis consociatis.*

Autopsia anatomica docuit viscera, pulmones putà, hepar, pancreas, ventriculum, intestina, &c. Papulis Variolosis, à cutaneis vix absimilibus obducta. Hisce etiàm pustulis non nunquàm scatent trachæa arteria & bronchia. Prætereà passim occurrunt infarctus & inflammationes, gangrænæ & putredines. Visenda se præ-

bent omentum laciniatum & putridum ;
stomachus ulcusculis exesus &c.

ARTICULUS SEPTIMUS.

UT ritè & prudentèr in Variolarum curatione nos geramus , quatuor earum stadia debent oculis objici , ut varias ex variis stadiis sumamus indicationes , easque per varia medicamenta expleamus.

1^o. Primum stadium illud est , in quo viget febris acuta inflammatoria , cum variis variarum partium doloribus : quæ febris censetur esse naturæ conamen feminii Variolosi extricationem molientis ; undè naturam pravos humores è bonorum sinu segregantem , extricantem & ad corporis peripheriam amandantem ità judicare & juvare debemus , ut ipsius conatus vividiores exerentis vires imminuamus , eam verò tardiùs & inefficaciùs agentem excitemus , & calcari premamus.

Variolæ simplices , ab omni alio quocumque morbo abstractæ , sibimet ipsis sunt relinquendæ ; abigenda inutilis & sæpè noxia remediorum farrago ; diæta duntaxat refrigerans , demulcens & humectans esto.

Si omnia ferveant , vigeat febris acuta ,

sanguis mitti debet semel, aut pluries è brachio, vel è pede, collo, maximè si vis morbi ad caput ferri videatur. His primis diebus potus demulcentes, diluentes, refrigerantes, mucilaginosi affatim & pluries epotentur. Si symptomata videantur mitiora, parcius sanguinis missioni indulgendum est (nisi vires *oppressæ*, non *fractæ* videantur,) tuncque parca dosi non solum mittendus est sanguis, sed & cum maximâ cautelâ, hoc est, ne sanguinis missione vires ægri nimium fatiscant: debiliores sustentandæ sunt uno aut altero cochleari aquæ vel potionis cardiacæ. Porro sub his circumstantiis accidit aliquandò, ut misso sanguine pulsus evolvatur, fortior fiat, vires cordis sanguinis exuperantis copię regendæ antea impares, jam sui juris factæ reviviscant, & symptomata ad genuinam indolem accedant. Tunc temporis emetica & cathartica adhibenda sunt, quia hujusmodi status vel febris putridæ, vel malignæ soboles est, & non certiora novimus adversus has-ce febres præsidia; prætereà horum ope hospitans everritur saburra. Præferuntur autem emetica, quia illis-ce agentibus non impeditur; imò fovetur & adaugetur transpiratio; ut testatur mador, quo sub actione emetici corpus suffunditur.

Notandum tamèn est, quod Illustrissimus *de Haën*, in eximio suo opere, cui titulus *ratio medendi* &c. Emetica improbet, & quod iis nunquàm utatur, tùm quod juxtà eum, non minus fiat eruptio Variolosa non propinato, quàm concessio emetico: tùm quod æquè certè frequentes sint Variolæ benignæ, non datis, quàm datis emeticis. Cur igitur, inquit, corpora torqueamus? Præsertim cum motus vehementior excitatus, pluribus pejoribusque Variolis producendis aptus natus sit? Credit adstipulari sibi summum *Boerrhaavium*, altum de emeticis hoc in casu servantem silentium; sed juxtà eum conveniunt medicamina antiphlogistica, alvum lenissimè subducentia, nitrosa, enemata similia, tùm pediluvia, semicupia, aër humidus & temperatus, ut undiquè sublatâ resistantiâ, eruptio materiæ Variolosæ fiat ad cutem commodissima. Pro ratione febris, venæ sectiones repetuntur.

Quoad diætam, tenuis esto: juscula tertiâ quartâ-ve quâlibet horâ offerentur, potus parabitur ex incidentibus, blandis diaphoreticis, qualia sunt capillorum veneris infusum; decoctum scorfonæræ, bardanæ, rasuræ cornû cervi, radicis petroselinii. Si vires magis defatiscere videantur,

ad energetica cardiaca recurrendum: exhibenda interdum cochlearia aliquot portionum cardiacarum, quarum compositionem ingrediantur pulvis viperæ, spiritus volatiles cornu cervi, &c.

2^o. Commodè si exeant pustulæ, ægros bis de die per semi-horam in calido pedum balneo, ad usque genua & altiùs imponimus. Adhibetur autem aut pura aqua, aut emollientibus cocta, aut mista lacte. Alterâ à benè prodeuntibus die, exhibet Illust. de Haën, cum summo Sydenhamo, vesperè fyrupi diacodii unciam unam, unciam unam cum semisse; idem & mane tertio incipit fieri, daturque semper quâvis duodecimâ horâ paregoricum, sique opus est, augetur. Quotidiè autem, à morbi initio ad finem, enemata mollia, laxantia injicit.

Verùm si contingat, vel præ morbi vehementiâ, vel præ virium lapsu, eruptionem pro votis non succedere, curam ad datam indicationem sic dirigimus: si morbi ac febris violentia nimia-ve plethora in causâ sint, mox vena secatur semel, iteratò, pluries-ve: venæ sectio enim semper institui debet quovis Variolarum stadio, urgente febre, peripneumoniâ, phrenitide. Sin verò debilior vita in causâ est, eam

tunc cardiacis , vinosis maximè , erigere & excitare satagimus. Mira hîc & vesicantia præstant. Maximi & quoque momenti est in hoc morbo aërem sæpiùs renovare & linteamina mutare.

3^o. Quandò Variolæ erupere , congesta materies Variolosa acris symptomata inflammatoria exfufcitât , febris recrudescit necessariò , ut materies Variolosa faciliùs & tutiùs eliminetur. Undè toti esse debemus , ut bonam suppurationem inducamus , ad quam requiruntur calor & motus febri-les , modò extrà justos limites non excurrant , in quo casu , nullo prorsùs medicamine naturæ opus interturbandum est. Si verò timeatur ne minùs benè fiat suppurationis , vel ex eo quod præpropèro nimis passu absolvatur , vel ex eo quod tardigrada progrediatur , tunc variis auxiliis sunt adjuvanda naturæ conamina , ità ut languentia , quæ tardiozem inducerent suppurationem cardiacis , sudoriferis exfufcitantur : vivida verò per ea auxilia compescantur , quæ impetuosius circumactò sanguini fræna valent injicere. Hic audactèr mittendus est sanguis , præscribenda diæta demulcens , mucilaginosâ : imò & si pervigilium pertinax suppurationem interturbare videatur , syrupo de diacodîo indulgendum. Sic sive languens ,

languens , fivè vivida nimis suppuratio ad laudabilem indolem deducitur.

Juxtà observationes Doctoris *Thomæ Simsonis*, in Universitate Andreapolis Scotiæ Profess. Medici, syrupus de diacodio ægris non concedendus est, dùm suppurant Variolæ , nisi urgeant dolores atrocissimi agrypniæque pertinaces, quibus iu casibus mira præstat; imprudentèr verò adhibitus febrem auget deliriumque accerfit. Id observare ipsi contigit anno 1729, quo Variolæ fuerunt epidemicæ & teterrimæ. Autor est, ut in casibus memoratis enema injiciatur, quod syrupi prædicti effectus adjuvet, hâcque ratione securiùs & tutiùs de ipsius effectibus judicare contendit. Inflationis tempore catharticum præscribit: observavit enim purgationem in causam non esse retrocessus pustularum, & alvi fluxu vel spontaneo, vel arte excitato Variolas feliciter terminari, pluriès se vidisse testatur. *Consulantur hâc de re, si lubet, tentamina Medica Edimburgentia, tom. VI^o. pag. 144.*

Si pustulæ non repleantur, aut circulus baseos palleſcat, diaphoretici mineralis, vel pulveris beſoartici, aut de guttetâ grana aliquot ſumantur.

Si excrementa virideſcant, aut acidum

eructent infantes, potus absorbentes & anthelmintici identidè offeruntur.

Plurimi autores, & quidè maximè notæ, inter quos primas tenent prælaudatus rationis medendi autor, *Joannes Marquardus*, *Sidobre*, *Drelincour*, *de la Mettrie*, *Tissotius*, &c. volunt ut tenero forfice exitus puri detur, in totâ facie præprimis, aperiendò scilicèt pustulas Variolas, cum maturæ videntur. Ex repetitâ, inquiunt, hâc apertione maxima exurgit, tum ad venustatem conservandam, tum ad morbum debellandum, utilitas; frequenti enim illâ pustularum percussione earumque deterfione, corpus ingenti puris copiâ liberatur: & sic puris retrocessum in massam sanguineam prævertere conantur. Illustrissimus autè *Diemerbroekius*, in egregio suo de Variolis ac morbillis tractatu, eandem condemnat, ut cutem deturpantem, & nimiam curam exoptulantem.

4^o. Deniquè ubi per tres quatuor-ve dies perduraverit hoc-cè stadium, rumpèntur abcessuli pusque eructabunt viscidum, cujus pars viscosior fluendi incapax in apertâ remanebit pustula, crustam efformabit, sub quâ pus latitabit, morâ acrimoniam concipiet, & hanc partibus subjectis infliget, quæ pruriginem excitabit intolle-

rabilem. Porro tunc temporis huc collimare debet Medicus, ut crustas ad promptius decidendum determinet, & strictum cutis subjæctæ textum ita emolliat, ut minus irritationis sit capax. Ad hunc finem, oleo amigdalæ dulcium recentissimo, vel oleo ovorum, vel butyro infuso, vel de cacao ilinienda est sæpius de die facies præprimis. Hoc pacto remollescet cutis faciei textus, longè expeditior fiet puris expulsio, & proinde prurigo mitigabitur. Ubi autem eò pervenere Variolæ, res Naturæ Medicorum *Coryphæo* committenda est. interim sedulò cavebit æger, ne aëri frigidiore sese exponat, ne fame pressus cibus se ingurgitet: quod semel in Nosocomio hujusce Urbis, in puero duodecim circiter annos nato, observare mihi contigit. Hic jam convalescens & lubentèr deambulans, in gravissimum morbum, ex quo vix evasit, post copiosiores cibum, incidit.

Jamverò dissipatis crustis, antequàm diæta fortis permittatur, prodest summo-perè, quin & sæpè necessarium est saburram in primis viis nidulantem, unâ aut alterâ potione cathartica everrere.

In hoc ultimo stadio, dum omniâ benè sese habere videntur, suboritur quandòque febris putrida deutheropatica, puris Va-

riolosi cum sanguine cæterisque humoribus intermixtioni debita. Hæc autem febris, observante *Freindio*, nullis certius debellatur medicaminibus, quàm catharticis.

Si febris remittens, absolutâ exsiccatione, sui det indicia, ad kinkinam recurrendum.

NOTA. In confluentibus Variolis, undecimo vel duodecimo die sistitur, vel saltêm lentescit oborta primis diebus salivatio; saliva viscidior facta hæret in conceptaculis suis, variæ glandulæ salivales distentæ tumunt, & inducitur nonnunquàm angina, symptoma periculosissimum: hunc anginæ statum comitantur stupor quidam, ineluctabilis ad somnum proclivitas: quibus omnibus, notante *Sydenhamo*, medetur vinum emeticum largâ sat dosi propinatum. Gargarismata ægro sunt imperanda, vel ex aquâ simplici mellitâ, vel aceto alteratâ, vel ex oximelle scillitico. Si ischuria accidat, æger è lecto eximatur & obambulet paululùm.

Si crurum tumor non evacuationibus præscriptis cedat, tunc fotu foliorum malvæ, verbasci, sambuci, lauri, cum floribus chamæmeli & meliloti in lacte coctis facilè fugatur. *Sydenh. processus integri.*

Si oculis insint pustulæ, aut palpebræ

tumeant admodum , citò infusio croci orientalis in aquâ rosarum intra palpebras immittatur , *ne frustra Medicina paretur , dùm mala per longas invaluere moras.*

In Variolis pertractandis , toto cælo inter se differunt *Sydenhamus & Mortonus* ; posterior siquidè totus est in usu diaphoreticorum , quibus venenum Variolosum foràs eliminare nititur : præmissis tamèn phlebotomiâ atque vesicatoriis ad nucham atque pedes , nec non interpositis , pro renatâ , anodynis , quibus etiàm cardiaca & besoartica addit , demùm bolis catharticis curam terminat. Prior autèm , per totum morbi curriculum , diluentibus & refrigerantibus ferè sempèr utitur. Huic adstipulatur *Tissotius*. Verùm *Huxamius* , plurimis innixus observationibus , testatur multos esse casus Variolarum , in quibus maritandus est curandi modus *Mortoni* , cum *Sydenhamiano* modo.

Methodus indica *Daniel. Ludovici* , *Collect. Acad. tom. 3. pag. 338* ea est , scilicèt :

1a. Ab invasione morbi die , immerguntur Variolosi in fluminis proximioris aquâ.

2a. Die utuntur fero lactis acido pro potu.

3^a. Die, cucumeres aceto conditi esitantur.

4^a. Die, erumpentibus Variolis, merguntur etiàm vestiti in flumine, dein in lecto suo reponuntur: hâc methodo utuntur in Insula Javâ nigritæ, tùm ad Variolas, tùm ergà puerperas; morbus salubritèr sua percurrit stadia; cicatrices verò relictæ albæ sunt, qui color dedecorus ipsis videtur & ridiculus.



APPENDIX

DE

VARIOLARUM INOCULATIONE, SEU INSITIONE.

VARIOLAS humano generi maximè funestas periculofissimasque esse, extrà omnem dubitationis aleam positum est. Nulli morbo malignitate cedit, hominumque, qui è medio singulis tolluntur annis, decima ferè quarta pars lue Variolosâ perit, eorumque qui eâ laborant, septimus quisque ad orcum deducitur, collectis à D. *Jurino* in unam summam multis epidemiis. Familias integras contagio suo devastat, *Regum turre* *Pauperumque tabernas* æquo pulsât pede, videturque suam in divites lubentiùs, quàm in pauperes exercere barbariem. Hîc video filium deploratum, familiæ suæ spem unicam, à crudeli illo morbo è vivis sublatum: matrum tenerarum puellæ carissimæ mortem lugentium vociferationes, atque quos edunt ge-

mitus audire mihi videor. Sed quid moror in effingendâ tàm lugubri imagine ! citò ad propositum nobis scopum revertamus. Itaque , quid humanitati consonum magis , & Medico societatis amanti dignius , quàm vitam similibus conservare , & quasi ineluctabilem removere mortem ? Si hæc præstet Inoculatio , quis sanæ mentis illam poterit rejicere ? Porro id præstare , paucis probare conabor. De ejus origine primùm , deïn de methodo hanc peragendi simplicissimo dicendum puto.

Circassiorum hoc fuisse inventum credit Illustrissimus *Mead* ; in usu enim est , apud hanc barbaram gentem , adolescentulas , præprimis pauperiores , populis finitimis in servitutem à mangonibus vendi. Cùm igitur advertissent eò minùs , tùm de venustate , tùm de vitâ periclitari omnes hoc morbo laborantes , quò essent ætate minores , excogitatus est hic modus in tenera adhuc corpora Variolas immittendi , quo merx vendibilior lucrum majus apportaret. Nec Medicis quidèm aut Chirurgis apud eos opus est , sed ipsæ mulierculæ id exequi didicere.

Cæterùm jamdudùm Constantinopoli & Smyrnæ ars hæc exerceri cæpta est ; non quidèm à Turcis , ut volunt *Heisterus* ,
Voltaire ,

Voltaire, aliique, quibus fato ineluctabili omnia in vitâ evenire opinantibus, ei obfistere atque occurrere religio est; sed à Græcis, Armeniis, aliisque ibi degentibus, qui cum nostratibus eandem communicarunt.

Exemplum cæteris Europæ nationibus dederunt Angli, duce *Maitlando*. Hæc autem methodus adeò feliciter cessit, ut Angliæ Rex Potentissimus *Georgius primus* in totâ regiâ stirpe idem tentare nullus dubitaverit. Hanc hæud infelici successu tentarunt methodum Germani, præsertim Hanoveræ & Pyrmonti. Hos imitati sunt Itali, Americani, Galli, nupèrque admissa fuit Genevæ, Nemausi, &c.

Modus hanc operationem peragendi simplicissimus est: scilicet inferuntur brachio vel tibie Variolæ, ope incisionis pollicem longæ in cuticulâ factæ, cui superimponitur linteam carptum, pure è pustulâ Variolæ discretæ benignæ educto onustum, vel vesicatorii ope datur puri Varioloso aditus. Hoc verò contagio admissò, septimanâ vel octavâ die superveniunt rigor, calor & eruptio Variolarum, quæ discretæ & benignæ esse solent, modò infans ultrâ quinquennium constitutus, bono & refrigeranti, non calido ut vult *Heisterus*, re-

gimine usus fuerit , per quindecim circiter dies à vino & carnibus abstinere , aut purgatus , & aliquot jusculis diluentibus præparatus fuerit.

Ab erudito quodam traditur , (vid. *Lettres édifiantes & curieuses des Missionnaires* , XX Recueil , page 304.) Usus seminandi , ut vocant , hunc morbum , à longo tempore *Sinensibus* jam notum fuisse , qui & alio modo perficiunt ; pustularum enim aridarum , quæ à cute jam delapsæ sint , pelliculas aliquot vasculo murrino , ore cerâ arctè clauso , apud se recondunt. Cum Variolas igitur cuiquam immittere volunt , harum pellicularum tres quatuor-ve , interposito moscho grani pondo , cum gossypio in turundam formant , quam naribus intrudunt. Postrema hæc methodus graviora post se trahit symptomata , ut expertus est Celeberr. *Mead* , in adolescentulâ quâdam capite damnatâ , annos circiter octodecim natâ , cui Variolas more *Sinensium* inseruit. Incolumis quidem evasit , sicuti & sex alii rei , quibus contagium more nostro immiserat , sed graviora omnia passa est ; nam statim à recepto naribus veneno , acutissimis capitis doloribus , cum febre ad pustularum usque éruptionem nunquam intermittente miserè discruciatâ

fuit : quod in priori methodo Inoculatis haud observavit.

Tria adhuc hinc examinanda supersunt , scilicet 1^o. An Inoculatio sit Variolis spontaneis longè minùs periculosa. 2^o. An Inoculati nihil à recidivâ timendum habeant. 3^o. An Inoculatio validis propugnari possit argumentis. Tribus hisce quæsitis breviter , & quantum in me erit nitidè respondere conabor.

1^o. Ad primam quæstionem quod attinet ; nil nisi experimenta , in auxilium vocare mens est. Constat ex calculis à diversis Medicis , diversis temporibus & locis institutis , longè pauciores , proportionè servatâ , Inoculatione , quàm Variolis naturalibus interiisse. Nam ex D. *Jurini*, Medici Doctoris , natione Angli , calculo constat 1^o. Ferè decimam quartam hominum partem à Variolis spontaneis perire , saltèm in Angliâ , uti diximus. 2^o. Sextam septimam-ve naturalitèr infectorum partem mori. 3^o. Ex eodem certum est , ex Inoculatione in Angliâ tentatâ , quibusdam cum cautionibus adhibitis , nonagesimam tantùm partem è medio tolli. Quinimò si eligantur subjecta , ut fecit *Ramby* , vix millesimus ad patres migrat. In nosocomio Inoculationis Londinensi , ex 492 Inocula-

tis nupèr, unus tantùm obiit. Si aliqua *D. le Duc* est adhibenda fides, nullus ex sex Inoculatorum millibus periit, dùm intereà eodem anno, plus decem millia naturali laborantium epidemiâ fatis occubuerint. Ex quibus, minùs Inoculatis, quàm naturalitèr affectis imminere periculum, concludere pronum est.

2^o. Inoculati à recidivâ immunes sunt: inter enim tot Inoculatos sive infantes, sive adultos, nullus adhucdùm repertus est, qui Variolas de novo passus fuerit, licèt cum naturalitèr infectis vixerit, & cum ipsis decubuerit. Si autèm aliquod factum adversum relatum fuit, ejus possumus suspicari falsitatem. Etenim juxta *D. Maitland*, unus ex sex reis naugeti in Angliâ detentis, carcere post Inoculationem passam solutus, multis Variolosis auxilium præbuit, & sempèr ab isto morbo evasit immunis. In Angliâ, ex pluribus Inoculatorum millibus, in epidemicarum Variolarum medio quotidie degunt, & nunquàm iis laborant; quod etiàm de Græciâ, Galliâ, aliisque regionibus dictum esto. Prætereà Inoculatio nihil præstat, in iis qui jam Variolis spontaneis laboraverunt; nam unus ex ipfisinet reis superiùs relatis, qui Variolas naturales jam passus fuerat, abs-

que effectu Inoculatus fuit. Justà D. *Kirkpatrick*, domina quædam Inoculata, reiterare Inoculationem tentans, ipsamet incisiones sibi fecit, Variolosumque virus ipsis incisionibus immisit, sed frustrà: quemdam tantum capitis persensit dolorem mox evanidum. Undè ex iis concludere evidens est Inoculatos nihil timendum habere à recidivâ.

Aliundè dato, non concessò, veram esse quæ refertur historiolum de puero quodam, in quo tribus circiter annis elapsis, postquam ab infitione morbum contraxisset, de novo proruperunt Variolæ; nil contrà nos. Nonne & etiàm habemus certas nec in dubium revocandas observationes, raras quidem, quibus constat homines quosdam, qui Variolas spontaneas passi fuerant, rursus iis fuisse infectos? quod sufficit, ut possimus affirmare non magis timendum nobis esse à recidivâ Variolarum Inoculatarum, quàm à spontanearum. Si enim tale femèl evenerit, cur frequentius idem evenire non videmus? Et quid valet singulare exemplum, certum licèt & exploratum, cum in aliis ferè innumeris id genus experimentis, nil tale unquam usu compertum sit?

2^o. Quoad objectiones quibus infitio-

nem arguunt antinoculatores, eas ad quatuor præcipuè capita, brevitatis causâ, reducimus: scilicèt 1^o. Inoculatio, inquiunt, religioni adversatur. 2^o. Variolæ Inoculatione communicatæ, non sunt veræ Variolæ. 3^o. Ignoratur vera virtus Variolosi dosis, estque metus, ne major, aut minor adhibeatur. 4^o. Tandèm, ne cum Variolis alii morbi communicentur. His tantùm quatuor præcipuis objectionibus, quantùm in me erit, respondere conabor. qui autèm plura hâc de re nosse cupient, consulant Inoculationis fautorum opera Medica, & præprimis opus à D. *Petit*, Doctore Medico Celeberrimo, novissimè typis mandatum, thesimumque in hoc-*ce*lycæo Medico propugnatum, cui titulus *de Variolarum extirpatione quærendâ primum*, &c.

1^o. Inoculatio religioni adversatur. Nàm, inquiunt adversarii, malum, ut aliquid boni exurgat, alicui inferre per nostram religionem non licitum est; porrò ex infitione potest aliquod malum exurgere, siquidèm multi Inoculati mortui sunt, qui fortè per totam vitam à Variolis spontaneis immunes vixissent, aut ab iis incolumes evasissent, &c. Hæc est Theologorum moralium specialis objectio.

Hæc autem , ni fallor , sic solvi potest. Non equidè licitum est facere malum morale, ut indè exurgat bonum Physicum, nec morale ; V. G. non licitum est adulterium committere , eo ipso præcisè , quod maritus impotens sit , & ne , deffectu hæredum, hæreditates ad extraneos transeant ; sed licitum est malum Physicum facere , ut exindè exurgat bonum morale , vel bonum Physicum majus. Sic Provinciam peste infectam circumvallimus , omnemque qui metas vult transgredi , absque ullâ commiseratione interficimus , licèt peste nondùm sit affectus , & forsitàn , ex Divinæ Providentiæ Decreto , pestis ad vicinas Provincias non provenisset ; ergò à simili , &c. Sed nedùm Inoculatio sit malum morale , quin etiàm non est malum Physicum. Si enim esset malum morale , vèl ex intentione Medici Inoculatoris , vel ex ipsius negligentia ; sed prius dici nequit , & posterius per selectum Medici diligentis potest anteverti ; ergò non est malum morale. Non etiàm ferè dici potest malum Physicum , saltèm relativè ad malum prævisum ; hâc enim à fermento quodam sanguinem ferius ocius infecturo liberamur , ità ut ipsius possit dici antidotum ; sed quis sanæ mentis rejecit antidotum ? Ergò &c.

2°. Dicunt Variolas infititias non esse verum & geninum morbum Variolosum; ideòque neminem hoc experimento à Variolis in posterum tutum præstari. Verum, quâ fieri possit, ut contagium, hoc est, ipsum Variolarum semen, non suum, sed alium dissimilis generis morbum procreet? Planè non intelligitur; hæcque objectio ex ipsismet nostris adversariis destruitur; siquidem conqueruntur in novâ Angliâ naturales propagatas fuisse Variolas ipsâ infititione, eamque ipsam contagiosam esse dixerunt, &c. Aliundè experimentis certum est virus Variolosum ex Inoculatis desumptum, idem præstare, ac virus Variolarum spontanearum; ergo &c.

3°. Quoad tertiam objectionem, futilis & parvi momenti deprehenditur experimentis pluries repetitis; qualis enim cumque dosis adhibita fuerit, eadem præstasse, observatum est; undè nullus est metus, ne minor major-ve dosis inferatur.

4°. Tandem pergunt nos deterrere Inoculationis hostes infensissimi, dum metum subesse volunt, ne fortè simul cum Variolis, alius quidam morbus contagiosus, qui sanguini & humoribus ægri inhæserit, in sanum inoculandi corpus transferatur, eo quod subtilissimum & mirè actuosum
fit

fit omne contagium. Sed vix crediderim id unquàm fieri, ut unius morbi feminium, alterius qui diversæ naturæ, genitalem materiem secum ferat commixtam. Ut cumque autem res sit, non maxima est ratio, ut rejiciatur Variolarum infitio. Medicus enim Inoculator, in arte suâ peritus, Variolas per Inoculationem non immittit, nisi selectu factò. Accommodatissimæ sunt ad hunc usum infantium aut puerorum, cæterà sanissimorum & parentibus, quoad fieri poterit, sanis prognatorum, Variolæ. Aliundè observatum est, inquit D. Buchoz, in libro, cui titulus, *Traité historique des Plantes qui croissent dans la Lorraine & les Trois Evêchés, &c.* Morbos quosdam contagiosos, (luem veneream putà) quibus infitionem mox experturi laborabant, Inoculatione ipsâ fuisse integrè persanatos. Verùm omnes hos scrupulos, omnes hos metus tollunt prudentes & in arte suâ, ut par est, periti Medici.

Si igitur longè minùs periculum post se trahat Variolarum Inoculatio, & ideò majorem civium numerum societati servet, si à recidivâ eximat, si Religioni non adversetur, si veras Variolas efficiat & producat benigniores, (& hæc in nostrâ Thesi demonstrare conati sumus,) cur

methodum tam tutam, & humano generi tam salutarem rejiceremus?

Prætereà venustatem omnibus hominibus, præfertimque sexui sequiori adeò pretiosam, non defædare ratum est. Fertur enim Circassienfem & Georgicam gentem femineam illibatam suam pulchritudinem, hujus methodi auxilio, conservare. Hoc scribunt *de la Mottraye, Voltaire, &c.* Undè ex iis omnibus lubentèr concludimus admittendam esse Variolarum Infitionem, seu Inoculationem.

Dubia circà Inoculandorum præparationem, reperire est in prælaudatâ Thesi.

An dentur media ad Variolas penitus extirpandas ex Europâ nostrâ, & an Variolarum Infitio id possit præstare?

F I N I S.

QUÆSTIONIBUS PHISIOLOGICIS RESPONDERE
CONABITUR.

ERRORES TYPOGRAPHICOS LECTOR BENEVOLUS
EMENDET.



ARGUMENTABUNTUR

R. R. D. D. PROFESSORES REGII :

R. D. JOANNES-FRANCISCUS IMBERT,
Cancellarius & Judex.

R. D. HENRICUS HAGUENOT , *Decanus.*

R. D. FRANCISCUS DE SAUVAGES.

R. D. FRANCISCUS DE LAMURE.

R. D. GABRIEL-FRANCISCUS VENEL.

R. D. CAROLUS LE ROY.

R. D. PAULUS-JOSEPHUS BARTHÉS.

100



